

## 10 ASO TALOSAGA – 2018

### Aso Tolu\_3

## Leai ni Seevae

Inā tō 'ese ia ou se'evae i ou vae, auā 'ua sã lava le 'ele'ele o lo'o e tu ai nei..

Esoto 3:5

“Sa lapataia e le Atua Mose ina ia aua ne'i faalatalata atu ma le lē migao. O le aveesea o seevae o le faatusa o le amio faaaloalo e talafeagai mo taimi o tapuaiga faamaoni.”

O le lotomaulalo ma le faaaloalo, o uiga ia e tatau ona atagia ia i latou uma e õmai i le mea e iai le Atua. (*Patriachs & Prophets*, p. 252)

E tatou te õ mai i Ona luma ma le lototele e ala i le suafa o Iesu, ae lē tatau ai ona o tatou soona tuulafoa'i atu manatu ia te Ia peisea'i tatou te iloa Ona manatu, ma peiseai e tutusa i tatou. E iai i latou e tautala atu i le Atua silisili, mamana ma paia, ma afio i le pupula e le o'o iai se isi, e pei o se isi tagata, po o se isi fo'i e faatauva'a. E iai i latou e faia uiga i Lona malumalu e latou te lē faia i maota o ta'ita'i faalelalolagi...O le Atua e tatau ona silisili ona matuā faaaloalogia, o i latou uma e faamaoni le iloa o Lona mafuta mai, o le a ifo atu ma le loto maulalo i Ona luma. (*Patriachs & Prophets*, p. 252)

Peita'i na te aumaia faasili Lona alofa tunoa. O lea ua Ia faimai ai: “E tete'e atu le Atua i lē faamaualuga, ae na te auvatu le alofa tunoa i lē lotomaulalo.” (Iakopo 4:6)

E galue mai le Atua i lē e finagalo o Ia iai. Ma o nisi o taimi e filifili ai e Ia le mea faigaluega sili ona faatauva'a e faia se galuega matautia, auā o Lona mana e faaalua lea i le vaivai o tagata. E iai lava lā tatou fua e tatou te aloaia ai se mea e sili ma se mea e faatauva'a; ae o le Atua na te lē faatusatusaina ni mea e fua i le tatou faatatau. E lē tatau ona tatou faapea o se mea e sili ia i tatou e tatau fo'i ona sili i le Atua, po se ā fo'i se mea faatauva'a ia i tatou e faatauva'a fo'i i le Atua.

O le mitamita ia tatou lava galuega, ua le toe aoga lea...O le tau'i e lē ona o galuega, ina ne i mitamita se tasi; ae ona ua na o le alofa tunoa lava....

E leai se tapuaiga i le faamamaluina e le tagata lava ia o ia lava. O lē e faavivi'i lava ia iā te ia na te iloa mulimuli ane lona mativa masaesae i le na o le alofa tunoa lava e lelei ai lana auauna atu iā Keriso. Pe a o'o ina mitamita le tagata ia te ia lava ma faapito ana mea e fai ia te ia, e tulaga faaletonu le galuega....

## 10 ASO TALOSAGA – 2018

### Aso Tolu\_3

O le Kerisiano i lona olaga lilo, e loto malie e tuu atu uma lona ola i aso uma, e faamaoni lona loto e fai ai se mea ma e mama lona loto, e agamalu i taimi e faaita mai ai, e faatuatua ma amio lelei, e faamaoni i mea iti, o le tagata e atagia le amio a Keriso i Lona lava aiga – o lea tagata, i le silafaga a le Atua, e sili atu nai lō se misionare ta'uta'ua po o sē e oti faamaturō. ... (God's Amazing Grace, p. 270)

“O lenei, ia faamaulalo o outou loto i lalo o le aao malosi o le Atua, ina ia faaeaina outou i le taimi e tatau ai.” E auai uma le lagi i se faiga-paaga ma i latou e omai ia Keriso mo le ola e faavavau, ma tuuina atu uma i latou ia te Ia. E finagalo le Atua i Ana auauna ina ia tutū i lalo o le fu'a pisipisia i le toto o Perenise Emanuelu, ma finafinau pea e ala i Lona mana e faatumauina ai tulafono faavae o le Upu Moni i le mamā ma le lē faaleagaina. E le tatau ona o latou la'a ese mai le ala o le faafiti-i-lona lava ola ma le loto mauilalo auā o le ala lea e tatau ona malaga ai tagata Kerisiano uma. A o latou galulue 'au'autasi ma le Atua, o lo o tino mai Keriso i totonu, “o le faamoemoe o le mamalu”. I le faaosofia ai o i latou i le fiafia i Lona agamalu ma le faatauva'a, ua latou iloa ai le mauiluga lava o le olioli e faatino ai auaunaga ia te Ia. O faamoemoega faale-lalolagi e taofia ai faanaunaga e auauna i le Matai. (Review & Herald, May 11, 1897, par. 14)

E manaomia lo tatou faalatalata atu i le Atua, ma vaavaai pe lē o i ai ni masalosologa ma ni taumatematega leaga o lo o tatou faamamao ai le Alii Faaola. O le manatu-faapito ma le manatu ua atoatoa, e tapunia ai le faitoto'a o le loto e tete'e atu ia Iesu, ma faapea atu, “Ou te lē mana'o i Lau auala ae o la'u lava auala.” Ia faamaulalo outou i lalo o le aao o le Atua, ona Ia siitia lea o outou. O le faigofie ona faailoa o le loto faamaa'a, ola faalelalolagi, ma le fiafia i tu'inanauga ma le ola faaalialia, o le a silafia lava e le Atua, ma o le a vaaia uma ia agasala a'o latou aliali mai i luma o le silafaga a le Atua paia.” (*Testimonies to Southern Africa*, p. 78)

E iai tagata ua valaauina e le Alii o le a Ia faaogaina i Lana galuega pe afai e latou te faatagaina i latou e faaogā e tusa ma Lona finagalo. E na te matuā lē faaogāina lava se tagata o lo o taumafai e faamaulalo se isi tagata. Ia faamaulalo outou, le au usō e. Auā pe a outou faia lea, e mafai e agelu pa'ia ona feso'ota'i ma outou, ma tu'u outou i fanua e mamao ai lā outou tofā ma le uta faa-le-Atua. O le ā e iloa ai fo'i, e fiafia lava lau auaunaga e aunoa ma ni lape. Ia outou saili ina ia gatusa outou faatasi ma le ta'ita'iga a le Atua, ona outou usita'i atu lea i gaoiga uma a le Agaga Paia. (*North Pacific Union Mission*, March 23, 1910. Par. 5)